

## **Lutino weng romo pwonye** **Dul me 11: Too-lit ki Isaac Ojok**

**Acakki:** Itye ka dul lwod-wa me Lutino weng romo pwonye. Lwod man jo ma kelo bot-wu en aye Backup Uganda kacel ki Brinstad. I romo winyo dul lwod-wa ni bene ki i wiyamo me internet i wang [www.backupuganda.org](http://www.backupuganda.org) ki bene ka i tye onyo bedo i Gulu, ci i romo nongo dul lwod man calo dawn ma ki mako ki i Mega FM kacel ki i ka poko jami namo onyo lagal wang ki wer ma ki lwongo ni Divine Video and Music Library. Ki bene i gangi kwan magi; Highland Primary School, Gulu Prison Primary School, Gulu Town Primary School, Mary Immaculate Primary School, St. Joseph Primary School ki Christ the King Demonstration Primary School. Ka i nen i maro dul lwod me pwonye wa ni, ci bed agonya me nywako ki lupaco ni, lurem ki jirani. Ka i nen dano mapol guwinyo pi goro ma yelo lutino i pwonye onyo kwan, ci waromo lweny kacel me konyo lutino wa.

**Too-lit:** Wajolo wu ka winyo dul lwod wa me lutino we romo pwonye, dul me apar wiye acel (11) kama tin iwa yom ni warwate ki ladiro ma ngiyo dok konyo dano mapatpat i kit me lok, cam ki jami mapatpat malube ki kwan ma mege. Iwa yom twatwal dok ladit wajoli, wapwoyo jolo wa dok wapwoyo ye me rwate dok me nywako kwadwa tin. An nyinga Too-lit dok atye latic macalo lapwony i dul me Backup Uganda kama tin wamito wanywak kwedi i dul pwonye wa man, wapwoyo twatwal dok wajoli.

**Isaac:** Apwoyo matek, an nyinga Isaac Ojok, an atye daktar ma konyo lutino ma tye ki peko me lok, peko me mwonyo dek ki dong peko me winyo lok, eno ni aye jami ma cok angwen ma akonyo iye lutino ki luduito weng ma tye ki pekoe no ni. Apwoyo matek.

**Too-lit:** Wapwoyo twatwal Daktar Ojok Isaac kit ma i waco kwede ki kit kony ma in i konyo onyo diro ma in i tiyo kwede me konyo dano i kit goro ma i tito gi ma mako angwen kulu. Dong ka wacako, amito kong i titi-wa ma mako ticci eni ki dong kit yoo anga ma in it tiyo kwwede me konyo ma bino ki goro ma i kwano gi ni.

**Isaac:** Ticca eni dong arii iye, dong tye mwaka abic ma abedo ka timo ne i ot yadi mapatpat ki dul mapatpat ma gi konyo lutino ma tye ki peko ki goro. Amito waco ni kwan eni an an akwano ki i Makerere University, School of medicine ma i kwano iye mwaka angwen ka

dong mwaka acel i mede me timo gin ma gilwongo ni ‘*intern*’ ka dong in i kato woko i mwaka me abicce ci i cako yenyo tic i ot yat, i twero tic bene kama ki gwoko iye lutino, i twero tic kama dwong ata, i school ma gitye ki lutino ma gitye ki goro bene weng in i tiyo iye, bene i twero cako clinic ma meg i kene ma ki romo kelo iye ludito ki lutino ma gitye ki peko ma akwano gi ni. Kit ma wakonyo ki lutino eni, yoo ne dwong, me acel gin ma kilwongo ni miyo ngec; miyo ngec i kom peko ma akwano, peko me lok, peko me cam, peko me winyo lok ki peko me mwonyo dek, wapoko ngec eno ni i kin dano weng cake ki i ot yat cito kwede i gang kwan, cito wa i kin gang. Dano weng mito onge ni peko ni tye i kin lutino ento peko ni pe ki ryemo ki yat, pe ki miyo yat ci ao. Ki timo gin ma kilwongo diro ma ki konyo ki lutino ni labongo yat, gin ma leb munu lwongo ni ‘therapy’ en aye gin ma wakonyo ki lutino eni. Ki gin mukene en aye kelo latin eno ni timo gin ma kilwongo ni ‘assessement’. Ka in timo kwed i kom latin eno ni ci ki timo pim ka in i nongo kama latin eni peko ne tye iye. I waco cut ni latin eni peko ne tye ni pe loko pien jami ma kit eni otimo, latini eni pe mwonyo dek maber pien jami kit eni tye ka gengo ne, latini eni pe winyo lok pien iti tye kit eni- nongo i timo jami eno weng ma akwano gi ni ci dong in i moko ada ni goro moni tye kama dong in goyo yub onyo yoo ango ma in i romo konyo ki latin eni ki dong kit me lubu kor yoo ma in i konyo ki latin eno ni. Eno ni aye kit yoo ma atamo ni aromo waco ne wiye wiye kit ma wakonyo ki dano ma tye ki peko ma akwano gi ni, apwoyo matek.

**Too-lit:** Wapwoyo twatwal, i tito maleng ma ageno ni lunywal ki jo mapatpat ma tye ka winyo wa nongo gitye ka niang maber adada. Dong lok matut ne makato tung bot lutino, amito bene kong waniang, ticce eni tye okube ningi ki kwan pa lutino?

**Isaac:** Apwoyo matek, eni lapeny ma pire tek adada, peko me lok kube ki peko me kwan pien wan wangeyo ni lok pe waloko ki dog keken, cawa mukene waloko ki coc, cawa mukene waloko ki dul komwa, cawa mukene waloko ki wangwa kkeken ci jami eni weng gukube ki kwan ki niang pa latin kwan. Ma dwonge adada, jo ma kwedo kwed gunongo ni lutino matye ki peko me lok, kube i kin dano, miyo lok ki dano mukene dwoko lok eno ni/kwena eno ni boti me niang. Lutino ma tye ki jami eno ni ki nongo pole madwong bene gitye ki peko me kwan pien adam en loyo jami ni weng, ci ka in i tye ki peko me lok nongo bene peko tye i adami, gin ma okelo gin eno ni ci en peko acel eno cito balo peko me kwan, me niang jami, me gwoko jami, keto cwiny i gang kwan, niang ngo ma ki tye pwonyo ne wek nongo I bed

gwoko ki kare me niang ngo ma i kelo ngo ma i ninag woko ni i nino me lacen, ci lutino eni gitye ki pekoe ni weng. Latin ma tye ki peko me lok, pol kare bene tye ki peko me kwan. Latin ma tye ki peko me winyo lok, eno ni dong tye atir, ka pe i winyo lok ci dong i romo niang ning, i cako kwan ning, manyuti in dok omyero ki pwonyi i yoo mapat wek i niang, ci i nongo ni jami weng girom, gin tye ma okube woko, gin tye kacel pien adam aye kubu gin weng. Pingo ne ni adam aye loyo gin weng, gin ma okelo ayela i niang onyo i loki en aye wek cito yelo en adam ma konyo latin me bedo i ot kwan, niang jami ma en kelo woko i nino ma lacen, meno en aye ngo ma an atwero gonyo ne.

**Too-lit:** Apwoyo twatwal, i waco goro mapatpat ma i kwano nen i acaaki tye gwok makato angwen kulu ma in i ngiyo gi dok i konyo jmatye kwedgi. Dong goro magi kono ngo ma kelo-gi ki dong kit kony ango ma in i miyo malubbe ki goro moni, ka twere kong iti wek waniang ka kenyo maber.

**Isaac:** Abibedo wiye wiye ni goro egi ni weng dite adada aa ki i adam pien wan wangeyi adam loyo jami kom weng, i kit me neno, wek in i nen gin moni, nongo adam aye tye ka konyo ne, wek in i ngwe gin moni adam aye konyo, wek in i doggi obil gin moni onge kit ma tye tye, adam aye konyo, wek in i winy lok i niang maber, adam aye konyo ci jami ma kelo goro i kit me lok, kit me niang, kit me camo dek, kit me mwonyo dek ki kit me lok, jami eno ni weng cito yelo adam en aye min jami weng. I adam tye bute ma konyo in me niang kit lok mapatpat, dok kabedo acel tye ma konyo in me guru nying lok eno ni me kelo ne woko dok bene tye gin mo mabedo calo wii pem ma ribbo gi ka acel miyo in ka i winyo, i niang, lok eno cito gamo nyig leb ma myero in i kel woko guru kacel dwoko bino i lebbi in i kelo woko ma pore ki lagam ma omito in i gam ma lubbe ki lapeny ma ki penyi kwede. Gin mo keken cake ni gwok min latin eni i kare me nywal, latin opoto ogoyo wiye, remo gwok ocwer oton i adam, kelo gin eno ni, gwok min latin eno obedo ki ret ma latin pud tye i ic ocito i adam, gwok i nongo yat mo ma kitucu ki latin ma dong kinywalo yate no ocito oyelo adame ma pud latin toco bene kelo, gwok latin orii i ic, orii ki kato woko, okati ma latin olo pe twero koko bene kelo, ka latin eno ki nywalo pe ka yweyo maber ki keto i ot yamo bene kelo, cawa mukene bene pim mogo ki nyonyo pa munu ki bedo i kabedo ma jami calo mola tye i kabedo ne dok obedo ka camo cam ma i kabedo macalo man bene kelo ci tye jami madwong adada ma kelo peko eno ni. Dong yoo mapol ma wan wakonyo ki lutino eno ni en aye ‘therapy’ man

obedo kony ma pe i miyo yat pien i tye ka konyo adam, adam pe ki miyo ite yat, pol kare yat ma ki miyo ki adam kelo peko madit adada i kom dano, ci pol kare adam pe ki iyo ite yat. Megwa ni, wan wangeyo atir ni adam ma otoo ni pe otoo weng, pien ka adam otoo weng ci in bene i too woko. Ka ngat ma i neno kwo ento tye ki goro moni, manyuti nongo ngo-adame bute moni tye makwo ci en bute makwo ni ka yelo, ki miyo kero matek adada obidongo doko dit gamo kero matek calo timo gin ma luwote mutoo myero otim cako timo ne. Oweko latin bino ma nongo pe loko, wayelo latin ki diro mapatpat i kine ma latin oo i mwaka moni, latin cako lok woko-pingo pien wabedo ka yelo adam moni ma odong ni, adam eno tugi dongo madit, ongwelo okwanyo tic pa luwotgi ma otoo ni omedo i kome ocao timo ne en ma owkeo lutino ki kelo gi ma nongo okwer woko ento ka ki rweyo, oo mwaka mo cako wot ma goro goro paka jing, eno ni aye kit ma konyo kwede adam pa lutino, adam pa ludito wek gin mo ma gurwenyo ni odwog cen ocak timo ne kadi bed ni twero rii ento mot mot dwogo paka gicako timo ne.

**Too-lit:** Wapwoyo twatwal malubbe ki meno, macok kakenyo bene, amito awac kuman ni pol kare dano maro kati ki byek ka i nen goro moni tye ma tye ka yelo dano, pol kare dano kelo kit byek mogo ni en gin ma kuman aye okel. Ma i kine ami ma amaro winyo i kin piny en aye i kit me lok orii ka lok onyo pe loko, pol kare dano waco ni ka i nen lunywal pe loko leb acel, onyo kit kwo me kare ni ma dano tiyo ki lupidi, i nongo gwok latin ki nywalo lunywal loko leb Acoli ento lapidi pe loko leb Acoli man miyo latin rii mada ka pwonyo lok. I tamo ni byek macalo man tye ada?

**Isaac:** byek eno ni tye ada, pien wan wangeyo pol kare i Acoli dano weng ka peko tye ki yenyo tyene, ki cako kwedo ne en weko kadi wa i ot yat ka i kelo latwo, daktar pe cako coyo ite yat, kong kwedo ka cako coyo ci pieno an pe akok i kom lanywal mo keken, in ka peko tye, twera i yeny i byek byek bene madwong. I kelo jami madwong ma cok ki peko ci i poto i kom acel ci i waco ni en aye kome kikome, en aye gin ma pol kare daktar gitimo i ot yat. Pol kare wangeyo lunyodo ka latin pe loko giwaco an gin moni tye i te lebbe owek ki ngolo, latini eni ba nen calo leb mapol ma gitye ka loko aye tye ka nyweno wiye, kong dong ki lok leb acel. Amito gamo ne macek kuman, ka latin ma tye ki peko kit eno ba omyero i cwal i ot yat wek daktar aye omok ni latini eni ba te lebbe aye tye oowek ki ngol ki kany wek pe okel peko mo, ki ngol ki ot yat. Latini eni ba, leb ma wutye ka loko ne ki gang en aye tye ka kelo peko,

ci ka in i kelo daktar okwedo ci obiniango ki lok matir, ento tye kit eni, latin ma tye ki goro ka ki tye ka loko mapol i ngete nyweno wiye. Pingo, pien jami ne weng tye ka mako ne mot mot, ka dok leb dwong ata ngete, mene ma myero omak mene omiyo meno nyweno wiye dok ka ki keme ki leb acel keken ci mako ento latin ma peke ki goro mo keken i wiye, loko leb mapol i ngete dok konyo en pien ngeyo ni man ka acito bot baba na, omyero alok leb eni, acito bot lapidi na myero alok leb eni ci i nongo latin eni wiye cawa weng bedo ka pwonye jami madwong kit ma myero elok kwede leb i dok kwica. Ci loko leb madwong i nget latin ma peke ki goro ber ento loko leb madwong i nget latin ma tye ki goro rac pien medo goro ne eno ni cawa mukene.

**Too-lit:** Apwoyo twatwal, ageno ni kit ma i gamo kwede obimiyo lagam bot lunywal ma gimaro byeko tyen goro moni malube kit ma nongo gi tye ka neno ne kwede. Dong macok ki kakaenyo bene, angeyo ni malube ki lunywal ma gi kelo lutino gi botwu kany nongo guneno lanyut mo ma miyo dong gutamo ni latini myero wanen ladiro mo aye wek omok kom ngo kikome matye onyo wek latin man tye kuman. I tamo ni ngo ma myero onen onyo kit lanyut ango ma lunywal mmyero gunen con i kom latin gi wek gunge latini eni romo bedo ki goro eni myero wanen ni wanongo kony con wek goro eni pe oyel.

**Isaac:** Apwoyo, eni aye dong lapeny a pire tek adada cok pien en aye dong obikelo wii lunyodo maber, wan wangeyo ni latin ka i nywalo lok cake wa ki ic ma in i waco ni winy baba ni odwogo en, latin gwneyo tyene, winy mama ni, arr timo gin ma kit eni, latin loke, arr loke i dwog tung kany, arr i nyona do-loke ki i ic pien tye ka winyo lok eno ni, pingo, pien lok cake wa ki i ic. Ma latin kati woko ni dong ngeyo dawn jo ma cok i ngete, jo ma bedo i ngete macok calo baba ne ki mama ne ni, eni ngec eni dong mede kwede ameda. Teki latin oo oo dwe abicel latin peke ka timo jami mogo macalo tuku atuka ni ba-ba-ba-ba, ma-ma-ma-ma, da-da-da-da, twora in dong i cak penyo wi ni mmm dwe abicel latin eni peke ka timo jami eni, dwe aboro twora ocak lwongo mama, baba, jami ma dong cok cok ki lok pa dano lok ma en obedo ka pwonyo ne i ngete. Oo i mwaka acel, latin myero ollok nyig adi-acel, mwaka ariyo nyig ariyo, adek-adek onyo angwen. Ka latin peke ka timo jami, pingo i mito ni latin oo mwaka acel ka i cak yenyo ngo marac ki latin. Ma pud latin oo dwe abicel peke ka waco ma-ba-ba-ba, ma-ma-ma, cak penyo wii, wan wangeyo lunyodo cawa mukene ka latin tye ka koko-tye ka gwneyo tyen, arr ni anga ma ogoyi, arr ga-ga-ga, ma-ma manyuti latini eno tye ka

winyo loki, tye ka niang, tye ka temo waci bene waci lagame ci mege bene cut tugi pongo wiye i winyo ni arr Acii en aye ogoyi, arr ngadi aye ogoyi, i neno latin iye tugi bedo yom kun ki bino ki tingo. Ka latin peke ka timo gin eno ci dong I cak penyo wii, ka nen gwok I nyako matidi ma eni gwok obedo nywali me acel, peny dano ma i ngeti, ni arr latina ni dong oo dwe adii eni- dwe abicel, omyero dong obed ka timo ngo, dwe aboro myero dong obed ka timo ngo i kit me loke, came mulu ne. Ka in i penyo jami ni weng ci weko in i ngeyo latin tye ki goro ango, latin tye ki goro i kit gin ango, i kit me lok, i kit me came, i kit me mulu ne, i kit me wote ci weko in i kelo latin con dok bene i Acoli ki waco puk con en aye yat kot. Ka in i kelo latin con, wangeyo peko ne con, kicako konyo ne cut, manyuti en ma oo i mwaka acelariyo ni nongo aloka loka tye madit, loyo ma i kuru kong orii woko yako i cako kelo ne, eno ni cawa mukene aloka loka dong twatwal romobedo peke onyo bino mot. Meno aye ngo ma aromo waco ne.

**Too-lit:** Apwoyo twatwal, amaro labol ma i miyo makato bot anyira matino onyo mon matino ma pud gunywal anywala, pol kare ka i neno i kare macon i Acoli, ka dako ma onywal ki weko bedo i cing dayo. Ageno ni bedo eno ni onongo tye pwony mo ma Acoli oneno i bedo eno ni ma dayo mito obed ka miyo bot nyako ma pud onywal anywala en kelo dong ngo ma i waco bene ni anyira matino onyo mege ma peke ki ngec me penyo ki bot dano macok kwedgi. Man gin ma pire tek mada, dok ka dong dano owinyo lok macalo man ci dong waromo konyo. Dong malubbe ki ticci, ageno ni in dong i meno lutino mapol ki dano mapol malube ki goro ma nongo gin gibino kwede boti kany, romo bedo me kony bene ka i nywako labol mogo kwedwa, pe i romo lwongo nying gire ento i romo miyo labol mabeco.

**Isaac:** apwoyo matek, tic eni an dong atiyo pi mwaka mapol, aneno aloka loka madit-madwong, mukene ma bene aloka loka ma pe otime ci amito pe acit mabor, amito awac ni wan watiyo, watye i St Philips kany ento nying wa ki lwongo ni Faith Audiology Therapy Organization (FAITH) ci ocakodong i kene mwaka adek a dong watiyo eni, amito ami labol i kom lutino ma nongo gubedo labaci labaci, wacako neno gi i nge mwaka ariyo angec ma gubino ma onongo pe giloko ci ma wacako pwonyo mege gi ngo me atima lutino eni ka yako wacako kelo lutino kacel. Wacako nyutu g ngo me atima ki lutino eni kori ki kori, i ada iya yom, ma i mwaka ma okato ma guduku i nge kare ma miyo bot gi, wanongo aloka loka tye i kom lutino ni, atwero waco ni 80/100 onongo dong giloko, olo giwaco lok mo ma winye,

meno en aye ngo ma anongo atimo maber adada. Ki mukene bene tye ma aromo waco, mukene obino ma onongo pe camo maber, kilo gi peke, cawa weng gibedo ka ono, cawa two bedo ka mako gi ento ma waloko kit diro me miyo gi dek, dek ma nongo pore wek pe gubed ka ono wek dek ocit i obor gi, aona eno ni otugi juke, lutino odwogo tek, mukene bene dong mede ki rwec ma gubedo ka cito bot daktar me rwec, gucako wot, mukene bene olo gucako lok ma winye. Meno aye ngo ma awaco ni wabedo ka timo maber, tye ka konyo lutino ki lunyodo gi me dwoko kuc ki gen ma onongo dong gurwenyo, ci tye madwong ma dong pe aromo kwano ne. Maber ne ma tye ka time maber tye, mukene ma bene aloka loka pe, pien tere tye ni pe gitye ka lubu ngo me atima ento matye ka lubu jami ducu olo gitye ka neno aloka loka ma bene ka wagoyo gi cim olo gibino ci meno aye ma aromo gamo.

**Too-lit:** Wapwoyo twatwal, labol ma i miyo tye me yom cwiny matek twatwal, wangeyo ni pol kare ki waco ni lutino obedo mot ma ka tye i paco bedo nongo ii dano yomcwiny pire mada dok ka i nen goro yelo gi miyo lunywal tute twatwal me neno ni ginongo kony dok kit ma i waco kwede i labol ma meggi, lutino ma olo i neno gi, gitye ka neno aloka loka mapol ma meno nyutu ni tic ma wun wutye ka tiyo ne tye ka miyo kony mada bot lutino, lunywal ki dano mapatpat ma gitye ka nongo kony ki botwu kany. Dong bene watye ka bino i agikki i dul me nywako lok ma megwa man, kama dong ka wagiko wamito imi tam bot dul ariyo ma wanongo pigi tek twatwal bot lutino ma en aye bot lupwonye ki bot lunywal, kit tam ango ma i romo miyo botgi malube ki lok ma macalo ladiro ma neno yoo me konyo kit goro mapatpat ma yelo lutino.

**Isaac:** Me cako waco ne, amito cako ki lunyodo, pien mice ni tye botwa, in lanyodo mo keken ma Lubanga omiyi mot me latin ma tye ki goro, me acel kong i pwo iye Lubanga pien lutino weng mic ma aa ki Bote, ty tyeene ngo ma oweko ki miyo kit eno ni ku. Pol kare wan wangeyo atir, ka lutino obino kit eno ni ki mito ni ki kan gi woko pien ki nongo gin kelo ariyo, kono ka ngat moni onongo gi kwene, eno ni gin ma omyero wajuku woko pien kare dong okato woko. Ka latin obino ki peko i gang, wayele matek i niang nyng peko ne, ka i niang, kong dok i yeny dok ngo ma omyero ki tim me dwoko ne, ka dong waniang nyng peko ne ci kwany i bol cen, kwany yoo me konyo latini en aye dong obbed namba acel, dok bene amito waco ni latn ma tye ki goro pe i kan, pien ka i kano ibingeyo nyng peko ne nining, ibingeyo nining ni nga ma mito okony, daktar, lupwonye tye mapol ata ma romo konyo latin

eni ento nongo wang ma guneno kong ka gicako miyo tam. Amito waco labole tye kit eni, tye lamego mo ma onongo tye ki latin ma tye ki gwong ento gire cawa tiko wot ki latini I kin gang, dano maro latini eni ki ngeyo goro ne ma cawa mukene ki miyo ite jami bino kwede gang ma, wii mine dong cung acunga nga ma omiyi nongo bene pe ngeyo ento nongo ki miyo ite. I nino mo munu mo aye omako cing latini ka ocito kwede wagang, oyubu wa ot ki mini, ocako waco ni ibicwalo latini bot daktar maptapat wek kicak konyo ne wek goro eno odok piny. Ento eno ni weng bino i kit me mar ma i nyutu, jol ma in i jolo ki latin eno ni, kit wot kwede ma i woto ma labongo lewic en aye oweko jami kit eno ni time ka onongo in I kan latini eno ni i ot, i loro wiye, romo too ngat ma konyi kwede peke ibicano kwede keni ci amito waco ni lunyodo ka dano macalo eno ni obino, cwal i gang kwan, wek obed i kin luwote, wek LC onge, pe i kan dano eni. Dok bot lupwonye, wan pol kare angeyo cwinyi mito ni i wot ki lutino ma tye ka niang jami kit ma i pwonyo kwede ento ka latin moni peke ka niang jami, i kwanyo kare ni me niang pingo latin eni tye ka timi kit eni, ka dong i niang, yoo ango ma atwero kwede kabedo ma latini bedo iye i gang kwan me konyo latin eni, yoo ango ma atwero lok kwede ki lunyodo ma gang me loko ka bedo pa latin eni wek okony latin eni, ka watimo jami eni weko waniang lutino eni matek bene weko wamako lurem i kin lutino ki lunyodo gi dok bene weko wakonyo lutino ma tye ki goro matek adada dok wangeyo gi dok bene wangeyo kama myero wacwal gi iye. Ci amito waco ni in lapwony, mito i nen ni ka latin moni tye ki goro kong i nen ni i neno yoo ango ma i romo konyo ki latin eni pien in dok romo bedo ni i tye ki ngec ma loyo lanyodo ci i waco it gi ni arr latin eni ki cawl kama kuman. Dok dong i kom jo ma tiyo i ot yat, ka i nen latin moni tye ki goro moni ma in pe i romo tic iye, pe i bed lwor, ka itye ki ngec cwal bot daktar mukene wek latin eno ni onongo kony maber, ka gwok bene i ngeyo kabedo mo maber, dul mapatpat cwal gi wek gunong kony. Man aye ngo ma aromo waco ne, wan weng myero wayele me bedo lupirida pa lutino ma tye ki goro, wabed lukony lutino ma tye ki goro wek gin weng gudong obed maber pien ka i konyo latin ma tye ki goro nongo wa kit me kwan.

**Too-lit:** Wapwoyo twatwal, i miyo tic atiya bot dano weng ma obiwinyo dul lwod me pwonye wa man, makato ne wan weng watye lupirida pa lutino matye ji goro. Kit ma yam Acoli kwo kwede, lutino onongo obedo gin ma pe tye lunywal onyo lanyodo moni, latin ka dong latin ma tye makwo nongo latin pa ngati mo keken neno onyo romo konyo ne i yoo mo

keken, ki dong bene amaro i cuku cwiny lunywal ki cwiny jo mapatpat ni ka Lubanga omiyi mic me latin onyo latini eno ni obino ki goro meno pe, pol kare dano neno goro calo acena, gin marac mada ento ka dong tye kumeno gangi, myero i ye ki dong pe i kane kwede, ada i nen ni i wek dano onge pire weko i yoo macalo meno i nongo kony wek latini ni onong kony i kom goro ma en tye kwede. Wapwoyo twatwal lok ma i nywako wageno ni bibedo me pwony mada bot ja ma winyo dul lwod me pwonye man. Ka wagiko dong, wamito imi lok ma romo konyo jo ma gwok ki tye ka winyo dul lwod me pwonye man ma gin bineno ni i ngeye lacen gin gikubu kwedwu onyo gin gioo ginongo kony ma mamako kabedo onyo in ki ludiro luwoti ma otiyo kacel.

**Isaac:** Apwoyo matek, wan wanonge i ot yat ma ki lwongo ni St Philips ma tye i Gulu High, ka in i ngeyo Health Center III ni ci i bino i penyo daktar ma konyo lutino, dano ma tye ki peko me lok, peko me cam, peko me winyo lok ci weng ki bikeli botwa kany. Dong mamako namba cim wa, abikwano- namba cim, watye ki namba cim ariyo, acel ma bedo abeda i ot yat ki acel ma ki woto kwede awota, ma bedo i ot yat tye 0393254402 mono in ka i goyo i dyeceng ma cake i kine cawa adek me bino i cawa apar wiye acel ki bigamo, ki dong malube ki man ma ki woto kwede awota bene abikwani wu ma tye 0778-769115 ka in i goyo eno ni bene ki bigamo i penyo lapenyi ci waniango bene. Ka in i bino bene atir i St Philips in ibinogno wa. Dul wa dok abinwoyo nyinge ma tye ki lwongo ni Faith Audiology and Speech Therapy Clinic (FAITH) pud dul manyen ma wa tye ka konyo lutino ma ka tye i kin lutino ma guru gi watye ka neno gi pe ki culu ento lutino tye ma ki culu dok ludito aye culu. Ka bene in i tye woko kenyo ma mito tyelo kor dul wa ni onyo tyelo kwot kwedwa, i twero bino pien dul ma wabedo ka tyelo kwot kwede wa dong pi mwaka adek ocito katumu ento dok watye ka yenyo jo mukene dok ka i paro pi lutino dok i neno lutino myero ki kony gi onyo gunong kony macalo megwa ni ci i romo goyo bota cim.

**Too-lit:** Wapwoyo twatwal Daktar Isaac, wapwoyo lwak ducu ma winyo wa i dul lwodwa man, dong in ma i tye ki latin ma tye ki goro onyo dano mo keken ma tye ki goro ma mako jami mapatpat ma en okwano gi ni, i romo kube kwedgi i namba onyo kabedo ma en okwano gi ni. Ki bot wa i Backup Uganda, wawaco lutino weng romo pwonye.



Gulu, Uganda / Zwolle, The Netherlands  
E-mail: info@backupuganda.org  
Web: www.backupuganda.org  
Tel: UG +256 7 72630078 NL +31 38 4604615

---

**Agikki:** Wapwoyo winyo Lutino weng romo Pwonye. i romo nywak tami kwed-wa, i romo ribbe facebook ki bene i romo cwalo lapeny mo keken ma i tye kwede i namba cim matye **0772630078.** I mito ngeyo matut i kom dul me Backup Uganda wek i bed ki ngec i kom jami matimei romo nongo i wang website [www.backupuganda.org](http://www.backupuganda.org) onyo i facebook, instagram, Twitter kacel ki LinkedIn.